

## **Am Kompromëss virukommen**

**Iwwerleeunge vum Jean-Michel Neser, Member vum Präsidium vun de LJB&JW**

Dir Dammen an Dir Hären,

Éier ech zu mengen Iwwerleeunge kommen, wëll ech dem Här Théid Faber Merci soen, fir seng Wieder a seng gutt Zesummenaarbecht am Kader vum Projet *Handlungspisten zu einer nachhaltigen Landwirtschaft in Luxemburg*.

Dir krut elo e flotte Projet virgestallt, mat deem mir an Zesummenaarbecht mam *OekoZenter*, Denkustéiss an Impulser fir eng nohalteg Landwirtschaft zu Lëtzebuerg ginn.

Am Numm vun de *Lëtzebuerger Jongbaueren a Jongwënzer* wëll ech elo kuerz op e puer Punkten agoen, déi äis am Dialog mam *OekoZenter* wichteg waren a weiderhi sënn. Fir äis ass et kloer, datt eis Zukunft an der Landwirtschaft läit. An dësem Beruf wëlle mir selbstständeg, unternehmereich an och nohalteg schaffen.

Eis Motivatiounen fir an der Landwirtschaft ze schaffen sinn - ënner anerem - d'Land, dat mir bewirtschafte kënnen an op deem mir Liewensmëttel produzéieren. Un deemselwechte Land weisen awer och nach vill aner Leit hiren Intressi. Eis Gesellschaft brauch ëmmer méi Haiser, Industriezonen a Stroossen. Dat ass eis Realitéit. Datt d'Landfläch ëmmer méi knapps gëtt, spiere mir op eise Betriber ganz gutt. Weder ech nach mäi Papp kënnen sech drun erënneren, datt de Pacht- oder Kafpräis eng Tendenz no ënne gewisen hunn. An dobäi ass alles un d'Landfläch gebonnen: d'Rekolt, eis Primmen, déi pro Hektar ausbezuelte ginn, eise Véibestand geglidert un d'Hektarzuel, ...

An eiser Wirtschaft, déi op Wuesstem baséiert, sënn och d'Bauere gezwongen, sech ze verbessern an ze vergréisseren, wann si bestoe wëllen. Äis ass et kloer: Fir de Betrib virun ze entwéckelen a fir e *Revenu comparable* ze erwirtschaften, mussen mir dat Land, wat mir zur Verfügung hunn, an Zukunft nach besser notzen - oder anescht ausgedréckt - mir müssen intensivéieren!

Op där anerer Säit beroden d'Naturschützer driwwer, wéi een eis Natur schütze kann. Fir si ass et kloer, datt et nach méi extensiv Fläche muss ginn. Dat heescht, datt der Landwirtschaft nach méi Fläche verluer ginn oder datt si an hirer Produktioun mat Oploen ageschränkt gëtt.

Dat si Verloschter fir eis Baueren, déi kompenséiert mussen ginn. Zousätzlechen Naturschutz muss sech fir äis lounen. D'Lëtzebuerger Betriber produzéieren fir de Weltmarkt a stinn a Konkurrenz mat Baueren aus Länner, wou den Drock vum Naturschutz méi kleng ass. De Markt bezilt den Naturschutz also net. Naturschutz ass deemno nëmme méiglech, wann de Méiopwand vum Lëtzebuerger Konsument oder Steierzueler iwwerholl gëtt.

Den Drock op déi landwirtschaftlech Flächen - deen duerch den Naturschutz ëmmer méi grouss gëtt - stellt fir äis eng grouss Motivatioun duer, fir mam *OekoZenter* - deemno mat de Konsumenten an Naturschützer zesummenzeschaffen an net op Reglementer ze waarden, déi eis Intressen net genuch berücksichtegen.

Zesumme mam *OekoZenter* konnte mir verschidde Kompromësser fannen, déi äis et erlaben, eis Flächen deelweis ze intensivéieren ouni den Naturschutz anzeschränken, mee esouguer ze ënnerstëtzen. Hei ee Beispill: Eng organesch Düngung do intensivéieren, wou et sënnvoll ass, dat

reduzéiert insgesamt d'Quantitéit vu mineraleschem Dünger an zousätzlech den organischen Dünger op méi extensive Flächen.

An deem Sënn si mir och frou, datt mir e Kompromëss mam *OekoZenter* fonnt hunn, wat eng zukünfteg Landschaftspflegeprime betrëfft. Mir sinn äis bewosst, datt d'Konditiounen fir dës Prime ze kréie méi streng ginn well déi deelweis bestehend Konditiounen un de *Greening* wäerte gebonne ginn. Et ass fir äis wichteg, datt esou eng Prime flexibel iwwert e gestaffelte Punktesystem gehale gëtt, an esou net onnéideg Drock op d'Betribler gemaach gëtt wann eng bestëmmte Konditioun net erfëllt ass.

Esou Initiative passe genau an d'Konzept vun eisem Projet *Nachhaltige Landwirtschaft*. Dës Iddie bréngen eis Baueren an de Schutz vun der Natur zesumme virun.

An esou Iddien hu mir an eisem Projet nach méi fonnt. Zum Beispill: D'Verbesserung vun der lëtzebuerger Eiwäissversuerung duerch den Ubau vu Leguminosen ass en Thema, dat äis an Zukunft beschäftege wäert. Awer Iwwerleeunge ginn an d'Richtung fir d'Groussregioun mat regionale Qualitätsproduite vun eiser Landwirtschaft ze iwwerzeegen. Dat ass eng schwierig Aufgab, déi mir net eleng bewältege kënnen, déi eiser Landwirtschaft awer vun direktem Nutzen ass.

Fir all dës opgezielte Punkten ze erreechen, muss een also matenee schwätzen. Soss kann ee keng gemeinsam Ziler fannen. Datt et net einfach ass, gemeinsam Ziler ze fannen, hu mir séier an de Sitzunge mat dem *OekoZenter* erausfonnt. Heiansdo waren hir Verrieder stur - a mat äis war och net ëmmer ze schwätzen! An trotzdeem kënne mir hei e super Resultat virweisen - an zwar Handlungspisten, déi d'Ziler vun de Jongbaueren an dem *OekoZenter* berücksichtegen. Dës Handlungspiste leeë mir eise Politiker an all den Acteuren aus der Landwirtschaft vir. Mir selwer wäerten och eise Part maachen, a verschidde Pisten am Kader vun eiser gemeinsamer Landwirtschaftsberodung virun entwéckelen.

Ech soen Iech Merci.